

Christian Meivah

January - February, 2015

Lhani seh thuso

Private Circulation

2015 kum lemute

Vannoi-a kum sim dan tampi um jongle, alhang pia kichepi phat simna dung jui in, kum kichaina lha December a konin, gojuh nisat, huinun, chule asat le adap jong ahung kikhel jin, mihon kumthah agaldot pan jin ahi. Phat chesa ho igel leh lunghel aumin, ahung lhung dingpa igaldot leh kinepnan akidim jie. Mitin lung sunga kum thah iti kalem dem tia kigotna aum panjin ahi. Gollui thuchih khat in, 'Chaga'n khovei akineppi' ati. Hibang chun mi tampin lolhinna ding, phatthei channa ding, chule thilthah muna dingin kum thah akineppi jie.

Nahenga kidong nom chu ahile, 'Kum kiheichin ho hin nang dia kikhelna napeh hinam? Nadi nga kumlui le kum thah ipi akikheh na um em? Ole, kum thah in nahun khum tah vanga, kum lui a bang nahi nahlai em?' tih ahi. Mi hem phabep in December 31 nia hi kumlui lhah na dana, jule sa mea, laama, kipa khom ding akhoh sah in ahi. Chule kum thah nikho January khat nikho leh ksil tenga, von thah-a kivona, theng tah-a um ding atup ui. Mi loikhat in, kum thah nia ibol masat

pen chun kum lhungin ei jui-e, tin atahsan un, natoh hahsa le lung gim na thei ho aho jiuvin, mitoh kinel kinah kiti ho jong abol pouve. Ahin la, January khat nikho akichai chai leh kum lui-a inahin bangun ihingkit ji tauve. January tarik nia konin, ima sang uva um nikho 364 kum athah nganan bou imang doh ji tauve. Achu tile Christaa kona kinep na imuu hoi-a imansah-u hitam? Kum thah-a ko na lhagao hinkhoa khantoube ding igo ji tapouve. Ipi christian ihuiva hitan tem!

Eiho dia kum thah in kinep na eihin peh louvu mong hitam! Ahi loule, kum thah chu eiho dia igel lou vu khat tou ham? Kum thah a hi ipi ibol thei-u um em, tia ikikhol uva, kum thah-a ilut utoh lhona Pathen deilama kigotna inei diu hi dei ahi.

Kum thah lemna dia iti nakigot em? Bible a mi masaho kigotna veute. Noah in Pathen atahsan in, kinem le thanom tah in kong anasui sui-e (Gen.6:22), Abraham chun kinem tah in, Pathen tahsanna in ahethkah lou gam chu anajon jenge (Gen. 12:4), Jacob in hopsom Pathen pehte din kitepna ana nei-e (Gen. 28:22), David in Pathen thu alunga ako jingna din phondohna

ana nei-e (Ps. 119:15, 97), Daniel in hinkho theng manna dia kihabol ding anatin (Dan. 1:8), Peter in thi chana Jesu lhakaang lou ding anatin (Mt.26:33), chule Paul in Kipana Thupha jachatpi louva lhangsap jing ding anati (Acts 21:13). Kum kihei chinin amaho hi lolhinna, lungtup molsona, loupitah in ahin lhutpeh jiuve. Nangla sopi, kum thah in ito bang thilpha nabolsah ding hinam?

Kum thah a lut nom louva kum lui-a umden ding natim? Giltah in kigel temin, tuhi phat kijen pet ahin, ajole phat in nahin dalhante! Kum thah-a hin kinepna bei hinkhoa hingden khat in nate! Nangle nain sungin na Pakai dia itobang kilolna nalah ding ham? Lhagao hinna nangaichat louvu ham? Tahsa dam theina hihen, lekha thepna hihen, natoh muna hihen, na ngai chat ho kum athah-a namolso jouna din na Pakai belin. Nakinep na le nakipana achamkimna din na Pathen tahsan jingin. Pathen lhagao in lung gel themna asim jouse eipe tauhen.

(Evan. Seiminthang Kipgen, Guwahati)

Christian migucha

Malachi themgao in, mihem in Pathen achom ngei em, aguh ngei em, ahiloule alepthol thei em, ati (Mal. 3:8). Hopsoma hop khat le thilto peh dolin, mihem in Pathen alheme, achome, agu-e, tin jong aki sune. Hopsoma hopkhat hi mihema ahapon, Pathena ahijoi tia Bible in

2

kichen tah-a aseivangin, ipe nomji pouvin, Pathen ilhem jiuvin, Pathen chunnla ibolu chu amel chih jie. Hijeh-a hi Pathen phatthei bohna ichan ji louvu ahi.

Bible a Dinosaur um

Daidep (lizard) tobang gan hing lentah saipi sanga lenjo masang lai chun leiset a ana umin ahi, tih leinoi lai hon agu achanga konin ahe doh tauvin, sappao in amin hi Dinosaur tin akihei. English Film a Juraisic Park tia kiminvo cinema film chu hi che sa vetsahna film anahi. Bible in jong hiche sa hi kum asang sang masang chun lei-a analenge, ti ihet sah uve.

Job 40:15-24 akisima ahile 'Behemoth' kiti sa lentah khat aki minphah in ahi. Hampa ne ahin, atha ahat-a hat, amei jong thingphung te bep pha, amei hi foot 52 chule atah sa saodan hi foot 152 vel hidin aki sei-e. Pathen bouvin atha joudin akisei-e (chang 19). Jordan vadung vela cheng in akisei in, Old Testament a hiche tobang sa hi 190 vei akiphah poh in, hiho atamjo chun Dinosaur hi aseina ahi (Job 3:8).

Job 41:1-32 a 'Leviathan' tia kisei sa jong khu Dinosaur aseivangin ahi tin akisei-e. Leviathan hi koiman avah-ngoi joupoi, sahang ahi. Masang lai-a manchah khat chan jong atah joupoi. Sa hin kichat jong aneipoi. Hiche sa hin mihem avetda pon, ahinla koi tobang in aphin lung

hanga ahile mihem jong atthat jie. Thih lhon jong amadin changpol tobang ahi (Job 41:27). Pathen ganhing semlah-a alenpen Behemoth ahin, Pathen sem ganhing ki chat umpen hi Leviathan ahi akiti (Job 41:9-10, 33-34). Ahai teng akama konin meikou akikho doh in, chule anah hom tenia konin meikhu ahung doh jie (Job 41:20-21). Psalm 148: 7 a kisei jong khu hiche sa hi ahi. Bible-a amin achom chom kisah jongle hiche sa hi kiseina hidia tahsan ahi (vetsah nan, Lamentations 4:3, Gen. 1:21, Ps.74:13, Jer. 51:34, Ezek. 29:3, Deut.32:33, Neh. 2:13, Isa.13:22, Micah 1:8).

Mihem khang thusim lekha bu hoa konin jong hiche daidep limpo salen hi leiset-a phat khat chun ana lhalei ti akimudoh-e. 550 B.C. a Greekte lekha bua mihem le hiche Dinosaur ana chengkhom ti aki mui. Masang lai-a milim jih hon jong sa lim hi ana jih doh un ahi. Pathen in nigup sunga sa ganhing ho ana semlai-a chu Dinosaur jong anasem hitante (Exod.20:11). Hiche sa hi acham chama amanthai kahsea mi hemtoh ana cheng khom hinte, tulai a eihon sel gamjanga ilhatsah bang u hinte.

Mihem thusim, scientific discovery, chule Bible a kona kihe doh danin, leiset chungu hin mihem jong dinosaur jong ana chenge, tihi ahi. Alim jong umle bel chule song len chungu ana kijihsa kimua, agu achang leinoi laihon amudoh-u ahi.

Pathen nachom tah em ?

‘Mihem in Pathen achom angai hinam ? Nahopsom tolou jeh u-le thilto ding nato lou jeh uva, neichomu ahi-e’ (Malachi 3:8). Pathen thil naguh khah em ? Soma khat hi Pathenin kei-a ahi, ati, hichu napeh louva ahile Pathen nachom, naguh ahi. Mose thusom lah-a khat chu, ‘naguchath lou ding ahi’ tihi ahi (Exod.20:15). Israel te hiche hi ana nit joulou anaume. Hijeh a hitia hi Malachi themgao in ana sei ahi.

Pathen iti anachomu ham ? Tolom tolou leh soma khat in Israel ten Pathen ana chome (Mal.3:8-9). Amahon soma khat hou-ina ana choi tapouve. Thilpeh lama jong apha ahoi ho Pathen anape tapouve (Mal. 1:8). Pathenin nangho koma um jongle kei-a ahi tia ase i chu Pathen akipeh louva mihemin akineh doh tengle Pathen thilgu akihi. Malachi themgao hin, Pathen napeh diu dol phatea napeh ule hisanga tamjo phat thei bohna Pathenin napeh diu ahi, tin ngamtah in ana sei-e (Mal.3:10-12).

Tulai christian phabep in, sei jui ho le Jesun soma khat pen atipoi tin ase i juve. Pathenin christian hon vang peta hih un, ati deh poi. 1 Cor. 16:2 in, ‘Hapta ni masa nileh’ to ding thu ase i in, chule Luke 21 a Jesun mihao le mivaicha thilto thu ase i in, mivaichanu chun aneisun ato jeh chun, mihao ho thilto sanga tamjo ahidan ana sei doh-e.

Mipa tom ngaina gup

Tulai hin mipa atamjon a-insung ahin ngailuvin, insung semdoh tei ago tauve. Kingolsah, judon, dumchep kitiho phatlouna ahethem tauvin, khonunga ahinvah diu achate semdoh ding akhohsah tauve.

1. *Mipan insung angailui* : Insunga achate le aji lungmonsah ding agelun, amaho toh kihoulim, kichep, lamdi a achena diuva hil kitiho akhoh sah tauve. Hinkho a akhohpen hi insung khantouna ahi, ti ahin geldoh tauve.

2. *Aji, achate toh phat mankhom ding atup ui* : Insung toh umkhoma phat mankhom hi oxygen ahi. Acha ten ama angaisangna ahen, chule ajinun jong ajipa ina aumtam ding adei joi ti ahei. Mipan insung aumpi a ahile aseding jong apha tei jie.

3. *Ahahsa ho jousea vaihom* : Satan in insung khat hi lamchom choma konin alhem jie. Insunga nat le sat umthei, natoh mulou jeh-a sum lhahsamna, chaten school a lhah samna anei maithei, thina, hahsatna, mi hehsetna kitiho um mai thei ahi. Hiche ho jouse chu Pathen mina iti kimaito pia, vai hop ding ham ti mi pa mopohna ahi.

4. *Insung lhagao hinkho sem* : Eph. 6:4 a mipan achate christian kihilna leh chonchan ahil ding ahi, tia Paul in anasei hi mipan achin ding angai-e. Deut. 6:5-7 a Mose thuhil, Pathen hi lungthim pumpia, lhagao

Idia amanu chun anei jouse atodoh hintem ? Pathen alungset avetsahna ahi (Lk.21:3-4). Paul in Jerusalem a christian vaicha genthei ho, Macedonia christian hon apanpi jeh uva apachatna aume (2 Cor. 8). Macedonia te chu mivaicha ahina uvin, ahinla Jerusalem a christian ho akhoh sah jeh uva, kiham bol uva thilto anapeh-u ahi. Amaho chu Gentile ahuvun Judah miho ana ki thopiu ahi. Ajeh chu amaho Pathena kipehdohsa ahijeh-u anahi (2 Cor. 8:5).

Eihon jong thilpeh ipesh tengule Pathen loupina dingle jabol na jala ipesh diu ahi. Pathen lungset na ichan tah jeh uva, hiche lungset na chu thilpeh-a ivetsah jiu ahi. Ei hon themcha ipesh ule Pathen themchan kangailui ti ivetsah-u ahijie. Pathenin ihinkho sunga phatthei bohna hijatpi eipeuva, eihon themcha ilepeh ule malsomna imulhom diu ahi. Judah ho chun soma khat sanga tamjo anape jiuve. Alhom tun lhomcha a-at ding, atam tun tampi a-at ding ahi tin Bible in ase i-e (2 Cor.9:6-7). Ipeh masat ule Pathen in tampia ilepeh diu aumsa ahi. Jesun, ‘pen chutile nakipe ding ahi’ tin ana sei-e (Lk.6:38).

Pathen ipesh diuva lom chu ipesh lou tengule Pathen chom ihiji tauve. Pathen akichom leh amaa kona malsomna eihinpeh lou diu ahi. Vaicha tah Macedonia christian hon Pathen mina Jerusalem vaicha ho akithopi chu sumil poute.

pumpi chule thaneina jousea ngailut ding ahi, kiti hi asuhmil lou ding ahi. Mipa Pathena ahat leh achale aji in hichu ajuji ahi.

5. *Malsomna ahet ding* : Mipan insunga Pathen phatthei bohna um ho asim sima, Pathen athangvah ngai ahi. Pathenin asemsa achate phatthei aboh jing nome. Hichu imu nomle Pathen sei ngai-a, athua nun ding, insung miten Pathen jabol ngai ahi. Insung kilungsetna, chamna, kipana, aumna dia Pathen lung hol ngai ahi.

6. *Insung mite kihou thei ding* : Insunga chengho kingaidam to jinga, kilungset a, kihoumat jinga, niseh-a chele valena ding ho kihetto ji ngai ahi. Mi abangin achena ding jong sei louvin, apot doh jitai. Hichu adihlou ahi. Thukhoh ima aum teng le kihoumat theina dia kihetto ngai ahi. Jacob 1:19 in, “Mitin thu ngai lamin jangkhai cheh hen, thu sei lama ngai kham cheh hen, lungsat lamin jong ngai kham cheh hen” tin aseie. Hiche hi insung in jui leh phante.

Joshua in, “Kei le kainsung miten Pakai Pathen bou kajen diu ahi” tia anasei hi insung mipaten jong geldoh cheh le aphai (Josh. 24:15). Tulai mipa ten, ainsungu khang tou hen, atiule Pathen alungset uva, ima jouse sanga chungnung joa Pathen akoi diu ahi. Pathenin insung a-mal som tengle ima jouse pha chamkim thei ahi, ajeh chu Pathenin bolmo aneipoi. Mipa ten Pathen song lel poute, Pathena kingai ute.

Taona thahat dan

Amang leh Alun gol phatah ahilhon in, alekha simna mun lhon akibang in chule B.A. jong thakhat tah in anachai lhone. Office khat a anatongkhom lhonin, suti akilah lhon in, twikhanglen a konga atou lhonin gam ana khol lhone. Twi, lilai-a atou na lhon kong chu buhbang toh aki tatkhan kong chu twi-in achup in atou khompi dang ho chu alhalut soh un, amani vang twijaap them ahilhon jeh in, twikol gamneo khat a ana ki jap lut lhonin ahingdoh lhon tai.

Akipah lhonin chule Pathen ana thangvah lhone. Twikol gam chu neldi gam anahin, thing le hampa jong aumpon, neh ding jong amudoh lhon tapoi. Pathen koma neh ding thumnaa atao lhon vangin, apha chom deh tapoi. Taova hatna tilou ahindoh lhonna ding lampi ahet lhonlou phat in, twikol ning langkhat khat-a apansa lhonin hatao taovin anatao lhone.

Amang chu hatao taova atao leh theiga phabep twikhanglen chun ahin ledoh peh-e. Achang lhat tah jeh chun, akiloipi ding numei khat athuma atao kit leh kong khat ase kit in, asunga tou jouse athin, nungah hoitah khat chu Amang umna vela akijap doh in, akichenpi tai. Lhakhat val hikoma avaitam jouvin, ina aki le nomin, Pathen koma atao tao kit a ahile amale aloi nu chu podoh din kong khat ahung lhung tai. Konga tou ding agot laitah in, ogin khat in

ahenga, “Nagol ngai nadalhah-a che ding kisa nahim?” ahintin, Amang in, “Kangai tah kajinu toh in lam jot ding kati ahitai. Kakipah-e, katao na ho neisan peh jeh in” anati. Ahin la, ogin chun, “Nasei chu adih nai, ahivangin idia nagolpa nadalhah got ham? Nangma taona ho chu ken kasanpeh nahipoi. Nagolpa Alun chun, “Pathen, kaloipa Amang in athum chan bolpeh in, tia atao jeh-a nathum ho kapeh nahi bouve. Alun vanga neh le chah namua, ji jong nanei ahi” ahinti phat chun anasuh mil aloipa Alun chu holdoh din ana lhajjel tan, ahinla aholmo tai.

Chuin Pathen henga, “He pa kaloipa Alun chu hoi-a uma hita em?” tia adoh leh Pathenin, “Ama chu nang dia tao jing mipha ahi jeh in, ken kakilah ahitai” tin ana don but-e. Amang jong chu alhisoh pum in, sei ding ahe tapon, “Kei taona sanga Alun in eitao pehna hatjo ahi tai” ti ana hedoh tai.

Russia gama christian

Russia gama christian ho genthei tah ahivu. Mi khat in hitin asune -- Keima Siberia a jankim in eiman un, songkula eikhum tauve. Indan neocha khat-a mi 20 eikhum ui. Kei songkula kalut lut in, ana um saho chun, “Mi ijat nahintha jeh-a songkula hung lut nahim?” tin eina dongui. Ken jong, “Ken mi koima kathat poi” kanati. Amahon, “Najou seihih in, hiche indana hi mithat cha

6 cha akhumu ahi” ahin tiuve. “Keiho hi mi thum ahiloule nga that ho ngen kahiuve. Nangma chu christian nahi jeh-a hia nahin khumu ahile aphot chetna din, na Bible neivet sah un” atiuve.

Atah mongin, Siberia gama mi koiman Bible achoi theipoi. Vai poten alah peh jiu ahi. Ahinla ken Mark lekhabu neocha chu katahsa aning khat-a kasela, kahvah vah-a thimchaa kasimji ahi. Songkula ho chu kavetsah-a ahile, hinsimin eitiu vin, kana simin ahi. Ajing jingkal in kathou gei jep tan, kahung khah leh amaho chu khatcha ana lum tapou ve. Aning langkhat-a atou kimun, mi khat chun ka Bible chu asimn, ana ngai ui. Kakoma amahon, na Bible in aseie hi kahe tauve, “Neisei peh un, Pathenin keiho mithat ho hi ei ngaidam nadiu vem” ahin tiuve.

Ken jong, “Pathen in na ngaidam soh kei thei-u ahi. Jesun jong cross a akikhaipi guchapa chu ana ngaidame” kati tai. Alah uva hapta khat eikhum un, chuin mun choma eikhum tauve. Kaloi ho chun ka Bible chu eidalhah sah tauve. Khatpa chun kahenga, “Nang Pathen chun Bible dang tampi napeh ding katahsane. Keihon vang nanga bou hi kanei diu ahitai” tin eina vailhah in ahi. Mark sut kipana thupha lekhabu chu amahon alung aheina diule ngaidam achanna diuva llingset ahi. Hichu amaho kasim sah thei jeh in Pathen kathang vah-e. Pa Pathenin hitiho hi sosah jinghen!

Christian chondan vettoh

Puchon pachon leh christian chondan kikhe ham, kikhe lou ham, veute. Puchon pachon kiti hi namtin in anei cheh-e. Christian chondan vang hi, Jesu tahsan christiante chon dan dia Jesun apeh ahin, akibang soh kei in ahi. Kuki chondan le tua christian chondan hi noi-a bangin aki lepkah thei-e :

1) *Kuki ten kuki nam chondan* ahet angai-e. Kuki te chondan alhongpi lia khen thei ahin, hichu - i) Hou lama chondan-khankho, ii) Kivai pohna chondan-khankho, iii) Damtheina dia chondan - ” iv) Pathen thilsem ho boldan -khan kho aumin ahi.

Hiche lamlia kikhen, Kuki chonchan hi, chinbaina ding tia ki khenna kisei ahin, aboncha hi ki matsoh hel ahi. Kuki ten puchon pachon le christian chondan lepkah na dinga, Kuki chondan le christian chondan anigel a hetchet ding ahi.

2) *Kukite puchon pachona hou* chondan : Pathen hi lachenga kisei ham, thuchih dola hama akimin phah teng - ‘Chungmang Pathen’ tin akisei in, Pathen hi mihem le thil jouse sempa ahin, kinelna aumpoi.

Pathen deilou thil bolda ding kiti hin, ima deichat jeh hilou-a Pa Pathen eisempa ahi jeh-a adei lou bolda ding ahi jenge. Pathen deilou boltei chu thina, adei lam bol hinna ahi, tia - thile hin thudola Pathen dei

7 le deilou bol dingle bolda ding idei kilhen kah ding ahi. Adam le Eve in thina akilhena, thilo ahilhon tan, achi lhah jouse jong thilo ahi tauve.

3) *Eisempa Pathen koma* vang kithum ding : Hinna bulpi ipen dohna ahijeh-a, ngaichat jouse Pathen ko ma um ahin, ideichat jouse Pathen henga thum ding ahi. Kukiten Pathen ahounau chu, Pathen koma adei angai jouseu akithumu ahin, Pathen koma vang thumna dinga aman chah-u, indoi tobang ho chu ahovu ahipoi. Christian hi phat-a Jesu min manga itao-u tobanga aman chah-u ahi bouve.

Bible thuhil lhongpi leh Kukite khankho kimatna chu Pathen dei bou bol ding, akibol louleh thi ding tihi akibange. Kukite puchon pachon hethem lou hon, christian hijeh-a chondan khankho apai-u chun Bible chondan lhongpi Jesun atoh molso ho jong apaithau tobang ahi. Ajeh chu Kukite Pathen houdola chondan le christian chondan, che dol lunggel tahsan lhongpi thakhat ahi bouve. Kuki hou chedola lunggil tah-a Pathen dei kibol, Pakai Jesu tahsan ten jong lunggila Pathen ahou u ahi.

(Dr. T. Lunkim)

Pathena kingai jing ding

Sabbath nikhoa Jesu hou-ina aum pet in, akhut langthipa khat amun, Jesun ahenga nakhut chu lhang doh in atile ahin lhang doh in akhut adam jeng tai. Hikoma chun

hou lamkai Pharisee ho jong aumun, amahon Sabbath nikhoa mi kibol dam chu asanje ahepouvin, Jesun Sabbath anit lou jeh chun Jesu chu ana seiseuve (Mark 3:1-5). Mihem in itobang thilpha bol jogle aseise aum tei-e. Mihem ho ngaichat jouse kibol peh jogle mi aseiset na diu akiholdoh tei jiuve. Mitin kipa sah hi tulai leiset-a hithei lou ahi.

Mi seiphat dingle seiset ding hi boipi ngailou ahi. Pathen sei ngai-a, napha tong jousen, min aseiset khattou ding ham tia lungjin ngailou ahi. Mi jouse lunglhai sah hi tulai in ahi theipoi. Pathen lung hola thilpha bol ho chungsa seisetna oimo na chu ho jouse Pathenin ale thuh jia ahi. Hijeh chun Pathen in amaho chu donbut nante tia um chu phapen ahi.

Pathenin gal nasatpeh nan te, olmo hih in. Amahon naha seiset chana, Pathenin nangma phatthei naboh ding ahi. Mihon nasonlha nomunte, ahinla Pathenin nachoi sang ding ahi. Nakhonung ding khoh sah in, Pathen thu kolchah in, Pathen thudih chun thoh jouna thahat napeh ding ahi.

Ipia kisong nahim ?

Keiman hiche ho kamang thei poi (1 Sam.17:39). Goliath galhangpa Philistine te panpi din ahung in, asan lam foot ko val asangin, a ompho sum eng jeng ahin, ateng lung jong sum-eng ahin, atengcha

8

sum-eng a kiseum ahin, alukhuh sum-eng a kiseum ahin, alum chu sepai khat in amasang sanga apoh peh tho ahi. Ama akisong in, koiham eingap cha tin Israelte achou chouvin, aki sen senin ahi (1 Sam. 17, 21). David in ama chu aven, khuchepa gamsa tobang chep tanlou khu Pathen dou ahin, keiman gathat tang kate ati. Aute le Saul lengpan, ahipoi David, nangma chapang cha nahi, khuche gal-hangpa khu gal-hang mong ahi, nangma chen lang na kelngoite ga kichin thimtan, atiule David in, ka chea kagatha tei tei ding ahi, ati phat in, Saul lengpan, chuti ahile ka gal vonin kivonin, atin agalvonin akivon sah-e.

David in, keiman hiche ho hi kamang thei poi, atin asut lhagam tai. David in songchang nga akilhen doh in, atenggol akilah in, akon tai. David in Pathen akison pin, chule Goliath in agalvon akisonpin, akidin te lhon tai. Goliath in David chu aven, vo chapang, uicha a nei ngaito a mol nahin kichoi ham, namaltel tel ing ting, vachate kavahna ding nahi, tin ahin nuisat tai. Chuin David in, Pathen min panin song chang khat seh seh-a ase leh gal-hang Goliath alhun athidel tai.

Goliath le David thusima kona kihilna chu, David le Goliath kidinte bangin eiho jong satan toh kidinte jinga ihiuve. Satan ijona diuva itobang manchah iman diu hitam, (1) Solchah Paul in satan lhagao engse meikong tobang inan

jou theina diuvin, Pathen galvon kivon un, ati. Thutah-a din ding, chonphatna nei ding, chamna kipa na thupha a din ding, tahsan det nei ding, huhhing kipana nei ding, Lha gao Theng thaneina man ding, hi cheng hitoh pangun, ati (Eph. 6: 14).

(2) Tu khanga Pathen na tong ho kisonna gal-manchah leh akivon nau chu : Bible sim, chihna le thepna, inchen pha, nei le gou, Car hoitah, mi sanga sanjep tei ding, mi nei thangset louna dia nei lama kisahlel, mi seiphat mi hiding tiho hi akisonnau le agal manchah hou chu ahin, satan gal dounan phanante, tin kigel thei nantem ?

Solchah Paul in vang, thil ijakai kapai doh in kamangcha ta poi, eh tobanga kagel ahitai, ati (Phil 3:8). Pakai thina cross tailou, ima dang kisonpi ponge, ati (1 Cor. 2:2). Tahsa lam thil boltheina thahatna sangin, hatmona jouse kakisonpi ahi, ati (2 Cor. 12:10). Keima kisong leng tahsa lama jong kisong thei kahin, chihna thepna ho chu kaki sonpi tapoi, hakamnan bou kagele, ati.

Solchah Paul in tahsa lam lunggel chu thina ahin, lhagao lam lunggel chu hinna le lungmonna ahi. Tahsa lam lunggel chu Pathen dou na ahi, tahsa lama chon ho chun Pathen alunglhai thei pouve, ati (Rom. 8:6-9). Satan hi leiset chungu thanei vaihom ahi nalai in, mihem adeh-a Pathen lhacha ho puimang theina tha anei nalai-e. Pathen lung

dei lam sanga satan lungdei suhbulhit chu bai jong abai in, nom jong anom in ahi. Vetsah nan : Eve chu Eden hona, satan in alhep-a chu, thilpha leh anom jeng aseih peh-e. Nele chun thipon nate, nele chun namit hung hahdoh ding ahi, theiga hi se le pha hetdohna ahi bouve, ase le apha nahetkhen ding ahi. Hichu Pathenin ama banga sele pha nahet diu hi, apha lou ahi, atipeh tan ahile, Eve in apha jeng amudoh phat in, thei ga chu ana netan chule athilo tai.

Hiche bang bang in, Officer te nupa thusim khat sei ute. Amani Pastor pa henga, car hoitah khat in anache lhonin, “Pastor pu, nadam dam lhon hinam” tin Pastor te nupa henga ana sei lhone. Pastor pan, “Kadam lhonnai, ipi seinom nanei em ? Ahinla, ipi kisei ding ham, genthei hi ka lallukhuh ahin, vaichat na hi ka ponsil ahibouve” ahinti leh Officer pa loinun, “Cho Pastor, hiti chun sei hih in, na genthei kahet-a ba, ikham hihih jongle khatvei na bazar kaina ding tin, dangka sang som ahinpen, aban chu olin hin-gel kit nange” atin ahile Pastor pan jong “He kate, kipa sah-a” atin lunglhai selin akilah tai.

Chuin officer pan, “Pastor pu, ajoa nasei chu nommo kasai. Hi ti chun sei hih in, ajeh chu tulai khan tou machalna ho navet angai-e. Gen thei tah-a houna toh hi tulai in, khan touna ahi tapoi. Apha chule anikhodung jui-a nakiman chah loule min

Nui tadiu hite

ija nasah lou ding chule nathusei koi man alah lou ding ahi. Michon chona nachon angai-e. Nang dia nalungset thei officer le minister tampi aume. Amaho phaten kihouphat le chun, nalhah samna ding umponte. Sap ho koma ken jong nahin seipeh nange” atile Pastor pan, “Kaki pah-e, nasei ho chu hin melchih nange. Nangin jong neihin kithopin” tin akikhen tau ve.

Officer te nupa achedoh jou in, Pastor pan ajinu henga, “Ikihou nau chu iti nagel em” tia adoh leh aji nun bailam tah in, “Nangpa, na cross kiput hi naput lhung jou lou ding hi tam ! Naput lhung lou ding hi kati jatpi ahi. Kei vang Eve toh bang ponge. Eve in amit ha dingle ase apha het ding adei in, Pathen thusei sangin satan thu joh akilhenin athilo tai. Officer pa koma, nathusei su bulhit nange, neihin kithopin, nati chu kangai them thei poi. Leiset nopnan napui mang got hitam ! La hin sange, “Cross chu injotna lampia kanei tei ding, chulou chu lamdang umlou, van kotpi hoi chu keiman mu lou ding, kamansah le cross lampi chu” ti la amit lhi akitheh pumin anasai.

Ajipa akisih in, sum chu satanin theiga Eve afeh danin agel lhonin, sum chu mivaicha genthei ho a hoppeh lhon tai. Cross put sanga sum chun put ding ago lhon tapoi. David in galvon akisonpi poi. Pathen joh akisonpi-e. Paul in, cross tailou thudang imacha kisonpi ponge, ati (1 Cor. 2:2).

(Rev. Seikholen)

* Hou-in baanga hitin lekha ana ki tah-e : *Hou-ina na mobile, money bag, na sakhaio ho dalha khan na te, ajeh chu amu mun, Pathenin ataona asan peh jeh-a akoipeh danin kilah khat inte.*

* Bazar a pasal khat in nupi hoitah khat koma, chomkhat neiki houlim pin, ati. Nupi nun, “Ipi din nam ?” tia adoh leh pasalpa chun, “Mi jalaha kaloinu kaholmo tengle numei hoitah khat kakihoupi jile kaji nu ahung chomlut lei jie” tin ana donbut in ahi.

* *Complete* leh *finish* kikkehna ipi ham ? Numei nang dia dih khat naki chenpi leh complete nahi. Ahinla nu mei adihlou khat nakichenpi khah le ‘you are finished’ nahi. Chule hiche numei dihnu chun nangma hi numei dihluo toh nakivop amukhah tengle ‘you are completely finished’ nahi.

* Achapan apa koma, “Hepa, Independence Day, itih ham ?” tia adoh leh apan, “Nanu ina aumlou nikho chu eiho independence nikho ahi” anati.

* Apan achapa henga, “Vacha mit hi apha lhez-e, ti iti navetsah thei dem” tia adohle achapan, “Hepa, vacha khatchan jong mitbeh akibeh lou hi ahi” ahinti.

* Anun, “Nanao-in ganhing avallut le ipi nabol dem” atile achapan, “Ganhing thana lou donsah loiding ahi” anati.

Het dia Phachom

11

* Churup chep (dumchep), khaini ne, ku-a tamul) ne mi, akimu le mel khit aume. Hichun chop, lol-hom, kamsung cancer natna asosah jie.
* November 2014 a konin Mysore hi Mysuru, Bangalore hi Bengaluru, Hubli hi Hubballi, tin akhel tauve.

* Numei naobu *transplant* akibol thei tai. Swedish numei khat naobu transplant akibol peh in, chapa khat apeng tai.

* Mihem eh le neh le chah kipai ho a konin, bio-methane gas asemun, hichun U K a mi 40 touna bus ho nomtah in alhai thei sah tai.

* America ten Extreme Accuracy, Exacto bullet (meichang) asem tauve. Meithal a mi khat doito chet ngaitalou, meichang chun akhah ding chu phatea akihetsah poule mei chang chu leng koile lea akhah ding pen chu akhah teiji, meichang jat khat ahi.

* British aerospace ten van-leng engine jat khat asemdoh tauve. Hi che vanleng hi pung 4 sunga vannoi mun khat a kona mun khat, lhung ding agana gang ahi. *5 times the speed of light* ahi.

* Assam a mi HIV natnei 9802 aki mandoh in, pasal 5974 chule numei 3368 chule chapang 452 ahi.

* Event Management course thah aumtai. Event Manager lhalo atam in, asim nom hon hia dongun : www.emdiworld.com / www.naemd.com / www.praxis.ac.in

* India state ho lah-a Chief Minister ding lottery kibol khahna state hi Meghalaya ahi.

* Guwahati khopi sunga Kuki chanu nurse simlai le natong lai ho mi 70 vel ahitai. B Sc. Nursing simna thei jong tampi aumtai.

* Vannoi leiset-a Ebola nat in atha mi 8,235 vel ahitai. Hiche nat hi alou aumpo lai-e. Migama cheho kichih thei un. Pon le von, tahsa ulsa, thi san, semen, injection hoa kilason thei ahi. Nat ahaveina gam ho hi, Nigeria, Guinea, Liberia, Sierra Leone, Ma-li, Spain, USA ho ahi. Liberia a na tong India mi khat amahon Ebola nat avei tapoi, adam tai, tin lekha ahin sut peh un, India ahung lhun in Doctor in akhol le, atahsaa nat hi abeitan, ahinla ama Semen (abo-a) natpi hi ana um nalai-e. Atah sa adamtah vanga a-semen a natpi (virus) hi aman, ni 90 sunga midang toh akitimat leh ahop doh thei nahlai ahi, tin doctor hon ase-ai.

* Saudi Arabia gama nungah ho hi atahsau amai-u abona atomu ahin, akichenpi ding gol-lhangin a-photo avet-a adeile akichenpi ji ahi. Gol lhang khat in a-photo a konin aki chenpi in, kichen jan chun apon chu ahodoh-a ahile numei chombek khat anahi tai.

“Nanghi kalhen nu chu nahipoi, tu tun kada tai” atin, akida pin, mihon ijat-a alhep vangun ajou tapouve. Tulai-a hi akicheng ding teni, khatvei toukhoma alim kimuto phal vang ahi.

12

Christian Meivah - sim ho taona akiman peh jinge. Kum 2013 a kona sumto Rs. 100/- ahitan, asim nom jousen hin peuvin, sum napeh lhaa kona kum nakisim peh ding ahi. M.O. hinthot hon Editor kipe ding lekha beh a namin le address suntei un. Editor pu Mobile No. 94355-51080. Manipur le Naga land a sumto pehna thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.

Hetsah nom ho

* Daal me nahon tengle minbai jep hen natile, pressure cooker a nahon ma in thao themkhat leh ai-eng (sutjou) powder themkhat toh halin.

* Changnam (Onion) leh ahlu (Potato) sakhao khat ahiloule pocha khat a koikhom lou ding ahi. Aki koi khom leh ahlu chu amon loi jie.

* Gobi lum (Cabbage, Bandha gobi) a vitamin C, B, Riboflavin, Niacin, Thiamin kitiho aumin, tahsa din gule chang damna ahi. Dengue nat veiho din gobi ahinga atui kiladoh kh on khat khat nikhat a thumvei adona ahile anat adam sah jouve.

= Editor pa mit operation jeh in tuchung thuso hi themkhat ahungsoh gei jep-e.

Christian Meivah
January - February, 2015

PRINTED MATTER

To :

Editor :
Rev. M. Haokhothong,
C/o, Tingjanem Manchong
Nichols High School, Satribari, K.C. Road,
P. O. Rehabori - 781008, Guwahati, Assam.